

Kwandika inkuru zishimisha abana

Iyo ni intego y'ibanze y'umuryango ILLUSAFRICA. Mu gihe cy'ibyumweru bibiri, kuva tariki ya mbere kugeza kuya 15 Ugushyingo 2004, uwo muryango ufatanyije na Editions Bakame, wakoresheje amahugurwa y'icyiciro cya gatatu, ku banditsi 6 n'abashushanya 9.

Ayo mahugurwa yibanze ahanini ku kunononsora inkuru zigenewe abana no kureba niba ziyana koko n'ama-shusho yazikorewe, nyuma hagakorwa umushinga w'igitabo (maquette) ushyikirizwa inzu z'ubwandikiro bw'ibitabo (maison d'édition).

ILLUSAFRICA ni umuryango w'abahanzi bandika bakanashushanya inkuru z'abana zikubiye mu bitabo, wavukiye mu Bubiligi mu mwaka wa 2001, ari naho ufite icyicaro gikuru. Muri iki gihe, uwo muryango umaze kugaba amashami mu bihugu byinshi by' Afurika.

Mu mwaka wa 2002 nibwo ILLUSAFRICA yakoresheje amahugurwa ya mbere mu Rwanda, kuva tariki ya 4 kugeza kuya 18 Nzeri, abera i Kigali mu kigo cyitiriwe Mutagatifu Pawulo.

Ayo mahugurwa asozwa, hashyirizwe ishami ry'uwo muryango mu Rwanda (ILLUSAFRICA/RWANDA). Amahugurwa y'icyiciro cya kabiri nayo yabereye muri icyo kigo kuwa tariki ya 5 kugeza kuya 18 Werurwe 2003, abanyamuryango ba ILLUSAFRICA -RWANDA bakomeza kunoza inkuru z'abana bari batangiye mu wa 2002 no kuzijyanisha n'amashusho yahanze n'abashushanya.

Izo nkuru zibandwaho n'abanyamuryango ba ILLUSAFRICA ni izo bahanga zishimishije, ariko zikaba zishingiye ku muco nyafurika muri rusange, n'umuco nyarwanda by'umwihariko.

Uwo muryango kandi ni n'urubuga rw'abahanzi b'abanyafurika, kugira ngo bashobore kwisanzura no kungurana ibitekerezo.

Muri ayo mahugurwa kandi, abahanzi



Abahuguwe na ILLUSAFRICA ifatanyije na Editions Bakame

b'abanyafurika baboneraho no kuvumbura imirimo inyuranye ivuka ku bwanditsi bw'igitabo, yashobora gutunga abantu benshi.

Ntibyoroshye kwandika igitabo

Ayo mahugurwa y'icyiciro cya gatatu yafunguwe ku mugaragaru na Minisitiri w'urubyiruko, umuco na

siporo, Bwana Yosefu Habineza. Yashimiye ILLUSAFRICA na Editions Bakame bagize icyo gitekerezo cyo guhugura abantu baha abana b'Abanyarwanda amahirwe yo gusoma no kujijuka. Aboneraho gusaba abahugurwaga gushishikarira ayo masomo, maze mu bihe biri imbere ibihangano byabo bikazasakara mu Rwanda hose, haba mu Kinyarwanda cyangwa se mu ndimi z'amahanga.

Amasomo yatanze na Dominique Mwankumi hamwe na Jean Claude Kimona ashingira ku gusesengura no kujora ibihangano byari byatangiye. Bwana Jean Claude Kimona ati « nta na rimwe umwanditsi agomba kwishyiramo ko yashoje inkuru ye, ahubwo agomba guhora ashakisha abandi bayisoma, bakamwungura ibitekerezo ». Koko rero, ngo ubwanditsi bw'igitabo

ni umurimo utiharirwa n'umuntu umwe, kuko ngo n'inzu y'ubwandikiro bw'ibitabo igira ibyo isaba umuhanzi ko yahindura cyangwa yongeramo.

Ni nayo mpamvu ILLUSAFRICA isaba abo ihugura kwibumbira mu ishahirahamwe, ibyo bahanga bakabikorera hamwe.

Ayo mahugurwa yashojwe tariki ya 15/11/2004. Bwana Dominique Mwankumi ari nawe Perezida wa ILLUSAFRICA yereka abitabiriye uwo muhangano ibihangano byabonetse.

Agaruka ku buryo byatangiye n'uko byagiye binononsorwa buhoro buhoro. Avuga ko hasigaye icyiciro cya Kane cy'amahugurwa, kugira ngo ILLUSAFRICA/Rwanda igire ubushobozi buhagije bwo gutunganya ibitabo by'abana. Bwana Dominique Mwankumi yanaboneyeho umwanya wo gusaba intumwa za Leta n'iz'imiryango inyuranye yari aho, gufasha abahugurwaga kugira ngo ibyo bize bigirire akamaro abana b'abanyarwanda by'umwihariko, ndetse n'ab'ahandi.

Intumwa ya Minisitiri y'Urubyiruko, Siporo n'Umuco, yashimiye ibyagezweho; inashimira abagize uruhare kugira ngo ayo mahugurwa agende neza. Ati « ibyo mukora ni umurimo wagombye n'ubundi gukorwa n'iyi Minisitiri, tubashimiye iyo nkunga, kandi turabizeza ko tuzabashyigikira ».

Mukanyandwi Béatrice